

Ang Istorya ni George Rickford

Niadtong 1969, si George Rickford, usa ka hamtong nga nagpuyo sa Leicester, England, nakasugat og mga misyonaryo gikan sa Ang Simbahan ni Jesukristo sa mga Santos sa Ulahing mga Adlaw. Sa sinugdanan si George misalikway sa ilang mensahe, apan sa kadugayan misugod siya sa pagpakigkita sa mga misyonaryo. Human sa tulo ka mga bulan sa mainitong pagsusi, nahigmata si George usa ka buntag nga may lig-ong pagtuo nga ang Simbahan tinuod.

Si George naghinam-hinam sa pagpaambit sa iyang bag-ong nakaplagnan nga pagpamatuod ngadto sa mga elder. Sa wala pa niya kini mahimo, ila siyang gipahibalo nga dili siya takos nga makadawat sa pagkapari isip miyembro sa Simbahan tungod sa iyang kagikan nga naay sagol-sagol nga kaliwat, nga naglakip sa mga katigulangan sa itom nga African nga kaliwat.

Usa ka adlaw, nakig-istorya si George uban sa usa ka suod nga higala mahitungod sa iyang mga kasinatian uban sa mga misyonaryo ug misugod sa pagtudlo sa iyang higala mahitungod ni Propeta Joseph Smith. Nahinumdom siya, “Samtang ako nag-asoy niana nga istorya, nalagsik ako ug may usa ka butang nga mipuli ug mibati ako sa Espiritu.”

Ang kasinatian mipamatuod pag-usab sa pagpamatuod ni George, apan ang iyang mga kabalaka mahitungod sa pagdili sa pagkapari nagpabilin. Samtang nag-ampo siya alang sa dugang nga pagsabot, kini nga mensahe miabot kaniya: “Dili ka kinahanglan nga makasabot sa tanan mahitungod sa akong ebanghelyo sa dili ka pa mopasalig sa imong kaugalingon ngadto niini. Unsa kaha kon ipakita nimo ang imong hugot nga pagtuo pinaagi sa pagdawat sa unsay imong nadungog ug isalig ang nahibilin ngari sa akong mga kamot?”

Nahupay sa mensahe, si George mainampoong mitubag, “Oo, Ginoo, akong buhaton. Ako modawat niini uban sa hugot nga pagtuo. Ug nga diay, salamat kanimo, salamat kanimo.” Paglabay sa duha ka bulan, si George nabunyagan ug nahimong matinud-anon nga miyembro sa Simbahan.

Niadtong 1975, tulo ka tuig sa wala pa ang pagpadayag sa pagkapari, si George mipahayag sa iyang pagtuo sa usa ka makiangayon nga Dios, misulat nga iyang gidawat ang pagdili “diha sa hugot nga pagtuo, nga walay bisan unsa nga pagpanagana.” Siya midugang, “Ako mapasalamat lamang nga ang pagkapari sa Ginoo sa makausa pa anaa sa yuta, uban sa tanan niining kauban nga mga panalangin, awtoridad, ug responsibilidad. Kini wala kaayo nako igsapayan kon kinsa ang aduna niini ug kinsa ang wala niini, apan mas importante kon giunsa kini paggamit.”

Niadtong 1978 si George nahibalo sa pagpadayag nga naghatag sa pagkapari ngadto sa tanang takos nga mga lalaki (tan-awa sa Opisyal nga Pahayag 2).

“Sa dihang nauli si George, siya ug si June [iyahang asawa] nag-istoryahanay sa tibuok gabii mahitungod kon unsay buot ipasabot sa balita alang sa ilang pamilya. Ang kausaban dako kaayo. Pagkasunod buntag, giordenahan si George Rickford isip usa ka priest sa Aaronic nga Pagkapari. Duha ka bulan ang milabay, giordenahan siya isip usa ka Seventy ug gihimo nga senior nga sakop sa korum sa Seventy sa stake. Ug duha ka bulan human niana, si George ug June Rickford nasilyo sa Templo sa London England, uban sa ilang upat ka anak” (“Ako Modawat Niini Uban sa Hugot nga Pagtuo”).